

Inatsisissatut siunnersuummut oqaaseqaatit

Siunnersuummut nalinginnaasumik nassuiaatit

1. Aallaqqaasiut

Inissiani attartortittakkani ineqarnermut tapiissutit pillugit Inatsisartut peqqussutaata nr. 3, 31. maj 2001-imeersup akuerineqarneratigut namminersortutut attartortitsisartuni attartortunut ineqarnermut tapiissuteqartarnissaq ajornarunnaarpoq. Ineqarnermut tapiissutit pillugit nu-taamik inatsisartut inatsisissaannik siunnersuuteqarnermi siunertaavoq ineqarnermut tapiissu-tit aningaasannaniutigineqarsinnaanerisa killilerneqarnissaa, tassa nalunaarummi aningaasa-nut killiliissutit il. il. eqqarsaatiginiarlugit inissiaq taassumalu pisatsersugaanera pillugit im-mikkut piumasaqaateqalernikkut.

2. Siunnersuummi pingaarnertut sammineqartut

Pisinnaatitaaffimmut atuuttumut tunngatillugu siunnersuutitut saqqummiunneqartumi makku erseqqissarneqassapput:

- Ineqarnermut tapiissutinik tunniussinissamut piumasaqaatit oqaatsimik ”inissiaq taas-sumalu pisatsersugaanera”-nik ilaneqarput. Taamaalilluni piumasaqaatip ineqarner-mut tapiissutissanik naatsorsuinermi inoqutigiit aningaasarsiaasa akileraaruteqaataa-sussat inigisamilu meeqqat aalajangersimasumik najugaqartut amerlassusissaat pillu-git maannamut piumasaqaataasutigut atugassarititaasut assigilerpai.

3. Pisortanut aningaasatigut allaffissornikkullu sunniutissai

3.1. Pisortat aningaasaqarnerannut kinguneqaatissat

Inatsisissatut siunnersuut imminermini pisortat ineqarnermut tapiissutinut aningaasartuutigisartagaannik sipaaruteqartitsissanngilaq, tassa ineqarnermut tapiissutissanut aningaasatigut killiliissutit il. il. pillugit nalunaarummi maleruagassat erseqqinnerusumik aalajangersarnissaannut inatsisissatut siunnersuut taamaallaat tunngavissaqarmat, piumasaqaammut nutaamut isiginnittumik imaqarluni.

3.2. Pisortat aqutsinerannut kinguneqaatissat

Pisortat aqutsinerannut tunngatillugu piumasaqaat nutaaq allaffissornikkut suliassaqartitsinerulernermik kinguneqassanngilaq.

4. Inuussutissarsiutinik ingerlataqartunut aningaasatigut allaffissornikkullu sunniutissai

4.1. Inuussutissarsiutinik ingerlataqartunut aningaasatigut kinguneqaatissat

Siunnersuut inuussutissarsiutinik ingerlataqartut aningaasaqarnerannut kinguneqassasoq naatsorsuutigineqanngilaq.

4.2. Inuussutissarsiutinik ingerlataqartunut allaffissornikkut kinguneqaatissat

Siunnersuut inuussutissarsiutinik ingerlataqartunut allaffissornikkut kinguneqassasoq naatsorsuutigineqanngilaq.

5. Avatangiisinut, pinngortitamut inuillu peqqissusiannut sunniutissai

Siunnersuut avatangiisinut, pinngortitamut innuttaasullu peqqissusaannut kinguneqartussatut ilimagineqanngilaq.

6. Innuttaasunut sunniutissai

Inatsisissatut siunnersuut imminnermini pisortat ineqarnermut tapiissutinut aningaasartuutigisartagaannik sipaaruteqartitsissanngilaq, tassa ineqarnermut tapiissutissanik naatsorsuinissamut nalunaarummi maleruagassanik erseqqissunik aalajangersaanissamut inatsisissatut siunnersuut taamaallaat tunngavissaqarmat, tassunga ilanngullugit inissiaq taassumalu pisatsersugaanera aallaavigalugit aningaasatigut killiliissutit.

7. Sunniutissai pingaarutilit allat

Siunnersuut pingaarutilinnik allanik kinguneqassasoq naatsorsuutigineqanngilaq

8. Oqartussaasut kattuffiillu il. il. tusarniaavigineqarnerat

Siunnersuut aningaasatigut killiliissutit il. il. pillugit nalunaarutissamut missingiummut peqatigitillugu piffissami 3. juli 2014-imit 21. juli 2014-imut ukununnga tusarniaassutigineqarpoq:

Naalackersuisut Siulittaasuata Naalackersuisoqarfia, Peqqissutsimut Attaveqarnermullu Naalackersuisoqarfik, Aningaasaqarnermut Nunamullu Namminermut Naalackersuisoqarfik, Inuussutissarsiornermut, Aatsitassanut Suliffeqarnermullu Naalackersuisoqarfik, Aalisarnermut, Piniarnermut Nunalerinermullu Naalackersuisoqarfik, Ilinniartitaanermut, Ilageeqarnermut, Kultureqarnermut Naligiissitaanermullu Naalackersuisoqarfik, Avatangiisinut Pinngortitamullu Naalackersuisoqarfik, Ineqarnermut Naalackersuisoqarfik, INI a/s, Iserit a/s, Isumaginninnermi Naammagittaalliuuteqartarfik, Kommunit Kukkunersuisui, KANUKOKA, Kattuffik Utoqqaat Nipaat.

Taakkununnga ilanngullugu inatsisissatut siunnersuummut tunngatillugu tusarniaanermi akissutit erseqqissarneqarput.

Ukununnga tusarniaanermi akissutinik tiguisoqarpoq:

KANUKOKA, INI, Aningaasaqarnermut Nunamullu Namminermut Naalackersuisoqarfik, Peqqissutsimut Attaveqarnermullu Naalackersuisoqarfik, Ilinniartitaanermut, Ilageeqarnermut, Kultureqarnermut Naligiissitaanermullu Naalackersuisoqarfik aamma Ineqarnermut Naalackersuisoqarfik.

Ukua inatsisissatut siunnersuummut oqaaseqaatissaqanngillat:
Peqqissutsimut Attaveqarnermullu Naalakkersuisoqarfik aamma Ilinniartitaanermut,
Ilageeqarnermut, Kultureqarnermut Naligiissitaanermullu Naalakkersuisoqarfik.

Inatsisissatut siunnersuummut ukua oqaaseqaateqarput:

KANUKOKA:

KANUKOKA-p kommunit sinnerlugit nalunaarutigissavaa, inatsisissatut siunnersuummut atatillugu tusarniaanermut akissuteqartoqassanngitsoq tusarniaaneq tunngavissaqarluarluni suliarineqarsinnaanngimmat. Siunnersuutip Inatsisartuni oqaluusereqqinneqarnissaanut atatillugu KANUKOKA-p kissaatigaa Inatsisartuni ilaasortat ilisimatinneqassasut kommunit inatsisissatut siunnersuummik tusarniaanermut akissuteqarsimanngimmata, Namminersorlutik Oqartussammi kommunillu akornanni qaammatip juulip tusarniaaviunnginnissaanik isumaqatigiissutaat eqquutsinneqarsimanngimmat.

KANUKOKA-p tusarniaanermut akissutaa tusaatissatut tiguneqarpoq.

INI a/s:

INI-p oqaatigaa, suliffissaaleqiffiup nalaani kissaatiginassagaluartoq attartortut inigisaminnik tigumminniinnarnissaat eqqarsaatigalugu piffissami killilimmi immikkut akuerisaallutik ineqarnermut tapiissutisinnaanissaat.

Tamatuma saniatigut INI-mit oqaatigineqarpoq, inatsimmi immikkut ittumik akuersissuteqarsinnaaneq atuutereerpat periarfissat kommunini aqutsisunut takujuminarsarlugit erseqqinnerutittariaqartut.

Oqaaseqaatit tusaatissatut tiguneqarput, tassa § 5, imm. 2 periarfissiimmat inoqutigiit isertitaasa malunnaatilimmik allanngornerisigut immikkut ittumik akuersissuteqarsinnaanermut. Naalakkersuisoqarfik ineqarnermut tapiissutit pillugit inatsimmut ilitsersuusiorpat INI a/s-ip oqaaseqaatai ilanngunneqassapput, taamaalilluni immikkut ittumik akuersissuteqarnissamut periarfissat pillugit itisilikkamik nassuiaasiortoqassaaq.

Illoqarfinnut anginerusunut, soorlu Nuuttut ittuni initaarnissamut sivisuumik utaqqiffiusartunut tunngatillugu INI-p oqaatigaa, pineqartup ukiup ataatsip iluani isumagininnermi inissiamik tunineqarsinnaanera imaluunniit pineqartup inoqutigiinnik anginerusumik inissarsiortunik paarlaaqateqarsinnaanera pillugu piumasaqaammik atuutsitsisoqassappat ineqarnermut tapiissutinik sipaaruteqartoqarsinnaasoq.

Oqaaseqaatit tusaatissatut tiguneqanngillat, tassa init assigiinngitsut akornini nussorsinnaanerup aaqjissuunneqarnera ineqarnermut tapiissutit pillugit inatsimmut ilaannginnera pissutigalugu.

Aningaasaqarnermut Nunamullu Namminermt Naalackersuisoqarfik:

Aningaasaqarnermut Nunamullu Namminermt Naalackersuisoqarfiup siunnersuutigaa inatsimmi immikkut paragrafiortoqassasoq, ilinniartut ineqarfiini imaluunniit namminersortut ineeqqamik attartortittagaanni ilinniartut attartorsinnaaner at siunertaralugu.

Oqaaseqaatit tusaatissatut tiguneqanngillat.

Ineqarnermut Naalackersuisoqarfik:

Ineqarnermut Naalackersuisoqarfiup § 1-imut tunngatillugu oqaatigaa oqaatsitigut allannguisoqarsimavoq, tamanna aamma siunnersuummi § 4, imm. 3-mut tunngatillugu atuuppoq. Ininik attartortarneq pillugu maleruaqqusat atuuttut tassunga taarsiullugu innersuunneqartariaqaralarput.

Oqaaseqaatit tusaatissatut tiguneqarput, tassa inissianik attartortarneq pillugu inatsisartut peqqussutaat innersuussutigalugu oqaasertaliussat erseqqissarneqarmata.

§ 2, imm. 2-mut:

Oqaatsit "inissiap pisatsersugaanera" siunnersuummi uani itisilerneqanngillat nassuiarneqaratillu. Oqaatsit taamaallaat oqaaseqaatini aamma Ilaqutariinnermut Inatsisinillu Atuutsitsinermt Naalackersuisoqarfiup tusarniaanermut allagaani 3. juli 2014-imeersuni nassuiarneqarput. Tassaapput piunasaqaatit tigussaasut, innuttaasut paasisinnaasaat malillugillu naleqqussarsinnaasaat. Erseqqissaassutigineqassaaq Ilaqutariinnermt Inatsisinillu Atuutsitsinermt Naalackersuisoqarfiup oqaaseqaammini "inissiap pisatsersugaanera" pillugu siunertaviusoq nassuiarmagu.

Piunasaqaatit aningaasanut killiliissutit il. il. pillugit nalunaarummi nutaami takuneqarsinnaassapput. Nalunaarutip atuarluarneqarneratigut innuttaasup paasisinnaalissavaa piunasaqaatit suut ilaatigut annerpaamik ineqarnermut tapiissutisarnissamut atuutsinneqarnerat.

Qeqqata Kommunua

Qeqqata Kommuniata oqaatigaa § 4, imm. 2-mut nassuiaatinut ilanngunneqartariaqartoq, namminersortut inaataannik attartornermi ineqarnermut tapiissutit pillugit qinnuteqarnermi immersugassamut Namminersorlutik Oqartussat attartortitsinermt isumaqatigiissutaata ilanngunneqartarnissaa.

Oqaaseqaatit tusaatissatut tiguneqanngillat Qeqqata Kommuniata oqaaseqaatai inatsimmi § 4, imm. 2-mut naapertuutinngimmata, tassa aalajangersakkap taassuma oqaatigimmagu ineqarnermut tapiissutit atuinermi aningaasartuutitut atuinermilu akiliutitut tunniunneqarneq ajortut.

Kommuneqarfik Sermersooq

Kommuneqarfik Sermersuup oqaatigaa aningaasanut killiissutissatut siunnersuutigineqartut ukiuni arlaqartuni taakkuujuarsimasut. Tamanna tunngavigalugu kommunip siunnersuutigaa atuisut pillugit kisitsisitigut paasissutissat Naatsorsueqqissaartarfiup saqqummiussai tunngavigalugit aningaasanut killiliissutit nalimmassarneqartassasut.

Oqaaseqaatit tusaatissatut tiguneqanngillat. Inatsisartut inatsisaanni siunertarineqanngilaq aningaasanut killiliissutit atuuttut allanngortinneqarnissaat, akerlianik ineqarnermut tapiissutinik tunniussisarnermi assigiinngiaartitsisalerniarluni inatsisitigut tunngavissiiinissaq siunertaavoq.

Aalajangersakkanut ataasiakkaanut nassuiaatit

§ 1-imut

Aalajangersagaq oqaasertaasigut allanngortillugu atuutsiinnarneqarpoq. Anguniagaanngilaq piviusunik allannguinnessaq.

Ineqarnermut tapiissutit inoqutigiinnut inissiami attartortittakkami najugaqartunut inissianik attartorneq pillugu inatsisartut peqqussutaanni ilaatinneqartumut tunniunneqartarput. Inissiamut attartortakkamut nassuiaatip inissianik attartortarneq pillugu inatsisartut peqqussutaanni nr. 2, 12. maj 2005-imeersumi kingusinnerusukkut allannguuteqartumi maleruaqqusat malippai. Ineqarnermulli tapiissutit tunniunneqartarnerat inatsisartut inatsisaanni matumani § 6, imm. 1-7-*ini* maleruaqqusat malillugit iluarsineqassapput.

§ 2-mut

Matumani pineqarpoq maleruaqqusat maannamut atuuttut allanngortinneqarnerat, tassa imm. 2-*mi* oqaasertaliussaq allanngortinneqarami.

Imm. 1-imut

Aalajangersakkami maannamut pineqarput inersimasut meeqqallu tamarmik inigisami inoqutigiinnut ilaallutik najugaqartut. Maannatut piumasaqaataavoq inunnik nalunaarsuiffimmit paasissutissat tunngaviussasut kikkut inoqutigiinnut ilaanersut aalajangiinissamut. Aamma § 7, imm. 2 naapertorlugu ineqarnermut tapiissutinik qinnuteqaammik tunniussinermi inoqutigiit amerlassusaat katitigaanerallu pillugit qinnuteqartoq paasissutissiissaaq.

§ 6, imm. 7 malillugu maleruaqqusanut nalunaarummi aalajangersarneqartussanut naapertuutinningsumik inissiaq avillugu attartortinneqarsimappat inunnik nalunaarsuiffimmi paasissutissat inissiamillu attartornermut isumaqatigiissut tunngaviussapput ineqarnermut tapiissutinik tunniussinissamut.

Imm. 2-mut

Aalajangersakkap takutippai piumasaqaatit ineqarnermut tapiissutinik tunniussinissamut aallaaviusut. Inoqutigiit tamarmiusut aningaasarsiaat akileraaruteqaataasussat aamma meeqqat 18-it inorlugit ukiullit inissiami aalajangersimasumik najugaqartut amerlassusaat aallaavigalugit ineqarnermut tapiissutit maannamut tunniunneqartarput. Tamatuma saniatigut aalajangersakkap takutippaa ”inissiaq taassumalu pequtsersugaanera” pillugu piumasaqaat

nutaaq, tassa ineqarnermut tapiissutit aningaasartassaannut killiliissutit il. il. pillugit nutaamik nalunaarusiornermut atatillugu piumasaqaatit nalunaarummi erseqqissaaffigineqassapput.

§ 3-mut

Matumani maannamut maleruaqqusat atuuttut ingerlateqqinneqarnissaat pineqarpoq.

Imm. 1-imut

Aalajangersakkami oqaatigineqarpoq, ineqarnermut tapiissuteqartoqarsinnaanngitsoq init najugarineqartut amerlassusaasa najugaqartut amerlassusaat inimik ataatsimik sinnersimappatigit. Inissiaq najugaqartut amerlassusaasa amerlaqataannik ikinnerusunilluunniit initaqarpat ineqarnermut tapiissuteqartoqarsinnaavoq.

Imm. 2-mut

Init najugarineqartut amerlassusaasa najugaqartut amerlassusaat inimik ataatsimik sinnersimappatigit ineqarnermut tapiissuteqartoqarsinnaanngitsoq pillugu pingaarnertut maleruaqqusamut aalajangersagaq ilaatinneqanngilaq. Immikkut ittumik pisoqartillugu kommunip imm. 1-imik avaqutsisinnaanerani aalajangersagaq periarfissiivoq. Immikkut ittumik pisoqarnerani assersuutitut oqaatigineqarsinnaavoq tassanngaannartumik inoqutigii katitigaanerisa allannguuteqarnerat.

§ 4-mut

Matumani maannamut maleruaqqusat atuuttut ingerlateqqinneqarnissaat pineqarpoq.

Imm. 1-imut

Aalajangersakkami oqaatigineqarpoq ineqarnermut tapiissutit taamaallaat ineqarnermut akiliummut atorneqarsinnaasut.

Imm. 2-mut

Tassa atuinermut atuinermilu akiliutinut ineqarnermut tapiissutinik tunniussisoqarsinnaanngilaq. Atuinermut aningaasartuutini maannakkorpiaq pineqarput innaallagialaq, imeq kiassarnerlu, kingusinnerusukkulli aningaasartuutit allat ilaatinneqalersinnaapput, tassa taama ittunut akiliuteqartarnissaq atuutsinneqalissappat. Inissiani nammineq pigineqartuni ineqarnermut akiliutit atuinermilu aningaasartuutit akornanni immikkoortitsisoqarsinnaavoq.

Imm. 3-mut

Aalajangersakkami oqaatigineqarpoq, Inissiani attartortitsisarneq pillugu Inatsisartut peqqussutaat nr. 2, 12. maj 2005-imeersoq kingusinnerusukkut allannguuteqartoq malillugu inissiani attartortakkani ineqarnermut akiliutit nassuiarneqarnerat.

§ 5-imut

Matumani maannamut maleruaqqusat atuuttut ingerlateqqinneqarnissaat pineqarpoq.

Imm. 1-imut

Aalajangersakkami oqaatigineqarpoq inoqutigiit ukiumi akileraarfiusumi kingullermi isertitaat akileraaruteqaataasussat tamarmiusut naatsorsuinermi tunngaviussasut.

Naatsorsuinermi tunngaviusoq pisortat ikiorsiissutaat amerliartuinnartut akileraaruserneqartussanngortinneqarnerannut naapertuuppoq. Taamaalilluni maleruaqqusat aamma isumaginninnerup iluani ikiorsiissutit assigiinngitsut akornini sunniiveqatigiittoqartarnera erseqqinnerulersinneqassapput.

Imm. 2-mut

Aalajangersakkatigut anguniarneqarpoq qinnuteqarnermi ukiumut akileraarfiusumut kingullermut sanilliullugu allamik tunngaveqarluni naatsorsuisalernissaq. Tassa isertitat qaffanneranni apparnerannilu atuutissalluni. Inoqutigiit isertitaat apparpata aamma attartorneq ingerlaavartog pineqarpat ineqarnermut tapiissutit naatsorsorneqartarnerannut tunngaviusoq § 10 malillugu iluarsineqarsinnaavoq.

Ukiup ingerlanerani nuunnermi isertitarineqartut ukiumut isertitatut naatsorsoqqinneqassapput.

§ 6-imut

Matumani maleruaqqusat maannamut atuuttut pineqarput.

Imm. 1-imut

Aalajangersakkami oqaatigineqarpoq, ukiumut isertitat akileraaruteqaataasussat § 5-imi maleruaqqusat malillugit naatsorsorneqartut ineqarnermut tapiissutinik pinissamut aningaasanut killiliissutit inorpatigit ineqarnermut tapiissuteqartoqarsinnaasoq.

Imm. 2-mut

Inoqutigiit aningaasanut killiliissutit inorlugit akileraaruteqaataasussanik isertitallit ineqarnermut akiliutip aalajangersimasumik procentiisa naatsorsornerat namminneq akilissavaat.

Imm. 3-mut

Nammineq akiliutissat aalajangersarneqarneranni inoqutigiit meerartaasa 18-it inorlugit ukiullit amerlassusaat eqqarsaatigineqassaaq.

Imm. 4-mut

Aalajangersakkami oqaatigineqarpoq, meeqqat inigisami najugaqartut amerlassusaa allannguutaat kommunimut nalunaaruteqarnerup kingorna qaammatip tulliuuttup aallaqqaataanit ilanngunneqartassasut.

Imm. 5-imut

Ineqarnermut tapiissutit naatsorsorneqarneranni inoqutigiit meerartaat 18-it inorlugit ukiullit eqqarsaatigineqassapput. Naatsorsuutigineqarpoq ineqarnermut tapiissutit ingerlaannartumik naatsorsorneqartassasut, tassa inoqutigiinni meeqqap ataatsip 18-inik ukioqalernerata kingorna qaammatip tulliuuttup aallaqqaataanit tapiissutit appartussanngorlugit.

Assersuutigalugu inunngortoqarneratigut imaluunniit nuuttoqarneratigut inoqutigiinni meeqqat amerlippata, attartortup ineqarnermut tapiissutit iluarsineqarnissaat pillugu kommunimut saaffiginnissaaq.

Imm. 6-imut

Ineqarnermut tapiissutit aningaasartaasa annerpaaffissaannik aalajangersaanermi inissiap taassumalu pequtsersugaanerata aamma eqqarsaatigineqarnissaat pillugu aalajangersagaq nutaajuvoq. Piumasaqaatip taassuma nutaap isumaa ineqarnermut tapiissutit aningaasartassaanut killiliissutit il. il. pillugit nalunaarummi, § 6, imm. 7 naapertorlugu suliarineqartumi erseqqissaaffigineqassaaq.

Imm. 7-imut

Aalajangersakkatigut Naalakkersuisut maannamut piginnaatinneqarput, nalunaarummi ukiumoortumik ineqarnermut tapiissutit pillugit aningaasanut killiliissutit, nammineq akiliutissat aamma aningaasat minnerpaaffissaat annerpaaffissaallu pillugit maleruaqqusanik aalajangersaanissamut.

§ 7-imut

Matumani maannamut maleruaqqusat atuuttut ingerlateqqinneqarnissaat pineqarpoq.

Imm. 1-imut

Aalajangersakkatigut oqaatigineqarpoq ineqarnermut tapiissutinik qinnuteqaat kommunimut tunniunneqassasoq.

Imm. 2-mut

Aalajangersakkatigut oqaatigineqarpoq, qinnuteqartoq pisussaasoq paasissutissanik sunilluunniit ineqarnermut tapiissutit naatsorsorneqarnissaannut pingaaruteqarsinnaasunik tunniussinissamut, taakkununga ilanngullugit inoqutigiit amerlassusaa, katitigaanerat isertitaallu kiisalu inissiaq taassumalu pequtsersugaanera pillugit paasissutissat.

Ineqarnermut tapiissutinik tunniussinermi qinnuteqartumut erseqqissaassutigineqassaaq, ineqarnermut tapiissutinut tunniunneqartunut tunngavigineqartut malunnaatilimmik allannguuteqarpata kommunitumut nalunaaruteqarnissamut pisussaaffeqartoq.

Qinnuteqartumut aamma erseqqissaassutigineqassaaq kommune § 12 malillugu ineqarnermut tapiissutinik uterteqqusinissamut periarfissaqartoq.

§ 8-mut

Matumani maannamut maleruaqqusat atuuttut ingerlateqqinneqarnissaat pineqarpoq.

Imm. 1-imut

Aalajangersakkatigut oqaatigineqarpoq qinnuteqaammik tunniussinerup kingorna qaammatip tulliata aallaqqaataanit aallartittumit ineqarnermut tapiissutit tunniunneqassasut.

Qaammatip aallaqqaataaniunngitsoq ulloq alla inissiamut nuunnermi qaammatip tulliuttup aallaqqaataanit ineqarnermut tapiissutit tunniunneqassapput.

Imm. 2-mut

Inissiamut allamut nuunnermi ineqarnermut tapiissutit pillugit qinnuteqaat nutaaq tunniunneqassaaq.

§ 9-mut

Matumani maannamut maleruaqqusat atuuttut ingerlateqqinneqarnissaat pineqarpoq.

Imm. 1-imut

Aalajangersakkatigut oqaatigineqarpoq inissianut attartortakkanut ineqarnermut tapiissutit ukiup naatsorsuuteqarfiusup naanerani nalimmassarneqartassasut. Tamatuma saniatigut aalajangersakkatigut qulakkeerneqarpoq ineqarnermut tapiissutit ineqarnermut akiliutit allannguutaannut malinnaatinnissaat.

Imm. 2-mut

Ineqarnermut tapiissutit ineqarnermut akiliutit allanngornerisigut nalimmassarneqassapput, tassa ukiup ineqarnermut tapiissuteqarfiusup naanerani kisimi pinnani. Ilutigalugu ineqarnermut immikkoortortat ataasiakkaat periarfissaqalissapput ukiumoortumik naatsorsuutit tunniunnissaannut piffissaliussap allanngortinnissaanut.

Imm. 3-mut

Inissiaq attartugaq ineqarnermut immikkoortortamut attuumassuteqanngippat ukiup ineqarnermut tapiissuteqarfiusup ukioq qaammatisiuteqarfiusoq malissavaa.

Imm. 4-mut

Siunnersuutip imaraa, ineqarnermut tapiissutinik pissarsisartut pisussaasut allannguutit suulluunniit ineqarnermut tapiissutit naatsorsorneqarnissaannut pingaaruteqarsinnaasut pillugit kommunimut nalunaaruteqarnissamut, taakkununga ilanngullugit inoqutigiit amerlassusaat, katitigaanerat isertitaallu kiisalu inissiaq taassumalu pequtsersugaanera pillugit paasissutissat.

Imm. 5-imut

Qinnuteqartup imaluunniit ineqarnermut tapiissutinik pissarsisartup paasissutissat pisariaqartut nassiutinnikkunigit suliamik ingerlatsinermut ajoqutaasumik ineqarnermut tapiissutinik qinnuteqaat kommunip itigartissinnaavaa imaluunniit ingerlaavartumik ineqarnermut tapiissutinik tunniussisarneq unitsikkallarsinnaavaa. Aamma aalajangersagaq malillugu qinnuteqartup imaluunniit ineqarnermut tapiissutinik pissarsisartup paasissutissat pisariaqartut nassiutinnippagit kommune paasissutissanik pisariaqartunik missingiilluni aalajangersaasinnaavoq. Paasissutissanik taakkunanga nalunaaruteqannginnerup nassataanik inuk ineqarnermut tapiissutisivallaarsimappat, kommunip aalajangersinnaavaa ineqarnermut tapiissutinik uterteqqusinissaq, tassa § 12 malillugu taamaaliornissamut piumasaqaatit atuuppata.

§ 10-mut

Matumani maannamut maleruaqqusat atuuttut ingerlateqqinneqarnissaat pineqarpoq.

Aalajangersagaq tunngavissiivoq ukiumi inoqutigiit isertitaasa malunnaatilimmik ataavartumillu apparfianni ineqarnermut tapiissutinik naatsorsueqqinnissamut. Isertitat apparnerannut assersuutigalugu pissutaasinnaapput toqusoqarnera, ilinniakkamik aallartitsineq avinnerluunniit.

§ 11-imut

Matumani maannamut maleruaqqusat atuuttut ingerlateqqinneqarnissaat pineqarpoq.

Imm. 1-imut

Aalajangersakkatigut oqaatigineqarpoq kommune tassaasoq ineqarnermut tapiissutit pillugit aalajangiisussaq.

Ineqarnermut tapiissutit pillugit aalajangiinermi § 2, imm. 2 malillugu paasissutissat aallaaviussapput.

Imm. 2-mut

Aalajangersakkatigut oqaatigineqarpoq, inissiani attartortakkani ineqarnermut tapiissutit ukiumoortumik aningaasanut aalajangersimasanut naatsorsorneqassasut, taakku tolvtedeliat attartortup ineqarnerminut akiliuteqarnissaa sioqqullugu qaammatikkaartumik

ilanngaatigineqartassapput. Taamaalilluni ineqarnermut tapiissutit ineqarnermullu akiliutit nikingassutaat kisimi akiliutigineqartassaaq.

Naggataatigut aalajangersakkatigut oqaatigineqarpoq ineqarnermut tapiissutit attartortitsisumut toqqaannartumik tunniunneqartassasut.

§ 12-mut

Aalajangersagaq oqaasertaasigut allanngortillugu atuutsiinnarneqarpoq. Anguniagaanngilaq piviusunik allannguinnissaq.

Imm. 1-imut

Aalajangersakkatigut oqaatigineqarpoq, § 7, imm. 2 aamma § 9, imm. 5 malillugit inuk paasissutissanik tunniussisimangippat imaluunniit inuk ineqarnermut tapiissutisivallaarsimappat ineqarnermut tapiissutinik uterteqqusinissamut kommune aalajangiissasoq. Pisuni taakkunani marlunni uterteqqusinissamut piumasagaataavoq kommunip tiguisumut ilisimatitsissutigissagaa akiliutinik uterteqqusinissamut piumasagaateqarnissaq periarfissaasoq, aamma tiguisup ineqarnermut tapiissutisivallaarsimaneq ilisimagaa ilisimasariaqaraaluunniit pillugu.

Imm. 2-mut

Aalajangersakkatigut oqaatigineqarpoq, ineqarnermut tapiissutit tunniunneqartut utertinneqarnissaannik piumasagaammik uterteqqusineq Kalaallit Nunaanni eqqartuussisarnermik inatsimmi maleruaqqusanik malinnittoq.

§ 13-imut

Matumani maannamut maleruaqqusat atuuttut ingerlateqqinneqarnissaat pineqarpoq.

Imm. 1-imut

Aalajangersakkakut aalajangersarneqarpoq inissiani attartortakkani ineqarnermut tapiissutinut aningaasartuutit avillugit Nunatta Karsianit 60 pct.-it kommunimillu 40 pct.-it akilerneqartarnissaat.

Imm. 2-mut

Aalajangersakkatigut Naalakkersuisut piginnaatinneqarput naatsorsuutininik saqqummiussisarnissaq kukkunersuisarnissarlu pillugit maleruaqqusanik aalajangersaanissamut. Aalajangersagaq taanna ilanngunneqarpoq ineqarnermut tapiissutinut aningaasartuutit annersaannik Nunatta Karsia akiliisarmat.

§ 14-imut

Matumani maannamut maleruaqqusat atuuttut ingerlateqqinneqarnissaat pineqarpoq.

Aalajangersakkatigut oqaatigineqarpoq, inatsit taanna malillugu aalajangiinerit tamarmik Isumaginnittoqarfiup aqunneqarnera aaqquissuussaaneralu pillugit Inatsisartut peqqussutaanni maleruaqqusat malillugit Isumaginninnermi Naammagittaalliuuteqartarfimmut naammagittaalliuutigineqarsinnaasut.

§ 15-imut

Matumani maleruaqqusat maannamut atuuttut pineqarput.

Imm. 1-imut

Aalajangersakkatigut oqaatigineqarpoq inatsit ulloq 1. Juli 2015 atuutilissasoq.

Taamaalilluni 1. juli 2015-ip kingorna ineqarnermut tapiissutinik naatsorsuinerit tamarmik inatsisip taassuma maleruaqqusai malillugit pisassapput.

Imm. 2-mut

Inatsisip atuutsinneqalernera sioqqullugu ineqarnermut tapiissutit naatsorsorneqarnerat inatsisip atuutsinneqalerneranit sunnerneqannginnissaa pillugu aalajangersagaq nutaajuvoq. Inatsisip atuutsinneqalernera sioqqullugu ineqarnermut tapiissutit naatsorsorneqarsimasut piffissap naatsorsuiffiusup naanissaanut atuutissapput.

Imm. 3-mut

Aalajangersakkatigut oqaatigineqarpoq, Inissiani attartortittakkani ineqarnermut tapiissutit pillugit Inatsisartut peqqussutaat nr. 3, 31. maj 2001-imeersoq, Inissiani attartortittakkani ineqarnermut tapiissutit pillugit Inatsisartut peqqussutaata allanngortinneqarneranik Inatsisartut peqqussutaat nr. 13, 12. november 2001-imeersoq, Inissiani attartortittakkani ineqarnermut tapiissutit pillugit inatsisartut peqqussutaata allanngortinneqarnera pillugu Inatsisartut peqqussutaat nr. 13, 14. november 2004-meersoq aamma Inissiani attartortittakkani ineqarnermut akiliummut tapiissutit pillugit Inatsisartut peqqussutaata allanngortinnissaa pillugu Inatsisartut peqqussutaat nr. 6, 7. maj 2007-imeersoq inatsisartut inatsisaata atuutilerinerani atorunnaassasut.

Imm. 4-mut

Aalajangersagaq malillugu aningaasanut killiliissutit il. il. pillugit nalunaarut maanna atuuttoq nalunaarummik nutaamik taarserneqarnissaata tungaanut atuutissaaq.